



Br: 01-SC-21/20

Phoenix, AZ: 25. redžeb 1441. god. po H.,

20. mart 2020. godine

Poruka muftije Sabahudin ef. Ćemana džematima Islamske zajednice Bošnjaka Sjeverne Amerike,

Esselamu alejkum ve rahmetullahi ve berekatuhu,

Allah dž.š. u Kur'anu Časnom u suri El-Bekare, ajet 155 veli:

وَلْتَبْلُوْكُمْ بِشَيْءٍ مِّنَ الْخَوْفِ وَالْجُوعِ وَنَقْصٍ مِّنَ الْأَمْوَالِ وَالْأَنْفُسِ وَالثَّمَرَاتِ وَبَشِّرِ الصَّابِرِينَ

“Mi ćemo vas dovoditi u iskušenje malo sa strahom i gladovanjem, i time što ćete gubiti imanja i živote, i ljetine. A ti obraduj izdržljive.”

Nesumnjivo je da su dani u kojima se nalazimo prepuni iskušenja prožeti sa dozom straha u svakome od nas. Vijesti koje svakodnevno slušamo čine da većina ljudi biva konstantno u stanju neizvjesnosti i brige za zdravljem, sigurnošću i krajnjim ishodom pandemije izazvane korona virusom. Međutim, vjernik je svjestan da je sve od Allaha dž.š. i podređeno Njegovoj volji, Kada'-i-Kader, ili iskazano kroz šesti imanski šart „Ve bil kaderi hajrihi ve šerrihi minallahi te'ala“, „Vjerujemo da sve što se zbiva i događa, i dobro i loše, biva sa Božijom voljom i Božijim određenjem.“

Kao odgovorni ljudi i institucija koja se brine za vjernike, a uzdajući se u Allahovu pomoć i odredbu, Rijaset Islamske zajednice u Bosni i Hercegovini na čelu sa Reisu-l-ulemom je proteklih dana donio nekoliko odredbi i uputa kako se ponašati u novonastaloj situaciji u vezi sa pandemijom korona virusa, a među kojima je i ova posljednja i najteža, koja tretira džumu namaz. Historija ne pamti globalnu nemogućnost obavljanja džume namaza za vjernike kao što je to danas. U svega nekoliko zemalja svijeta, ili bolje rečeno gradova, vjernici će biti u mogućnosti obaviti džumu, i to nas neizmjereno žalosti. Shodno navedenim uputstvima Rijasetu, kao i odluka i uputa nadležnih državnih organa u Sjedinjenim Američkim Državama i Kanadi, 11. marta sam uputio dopis svim džematima Islamske zajednice Bošnjaka Sjeverne Amerike, te se obavezao da ćemo pratiti situaciju i donositi odluke shodno preporukama Rijasetu i nadležnih vlasti. Nakon vanredne sjednice Izvršnog odbora IZBSA, odlučeno je da se godišnja Skupština IZBSA odgodi. Naši džemati su također slijedeći uputstva obustavili aktivnosti u džematima, a sve navedene odluke su donesene prvenstveno sa ciljem zaštite ljudskih života i zdravlja.

Islam svrstava zaštitu života na prvo mjesto. Pravo na život i zdravlje je utkano u same temelje Islamskog učenja i crpi se iz izvora Islama, časnog Kur'ana. Allah dž.š. veli u 32. ajetu sure El-Maida:

وَمَنْ أَحْيَاهَا فَكَأَنَّمَا أَحْيَا النَّاسَ جَمِيعًا

“A ako neko bude uzrok da se nečiji život sačuva - kao da je svim ljudima život sačuvao.”



Odluke naših džemata odražavaju visok nivo odgovornosti i profesionalizma, dosljednosti u sljeđenju ovog kur'anskog ajeta, kao i uputa i preporuka Rijasetu i Islamske zajednice Bošnjaka Sjeverne Amerike.

Stoga, koristim ovu priliku da se zahvalim svim imamima i džematskim odborima džemata IZBSA na blagovremenim reakcijama i odlukama koje su donijeli.

Obzirom da smo ovih dana fizički udaljeni jedni od drugih, pozivam sve imame i rukovodstva džemata IZBSA da iskoriste tehnološke mogućnosti koje su nam dostupne, kao što su društvene mreže, emailovi, telefonska komunikacija i dr. da održavaju komunikaciju i kontakt sa našim džematlijama. Također apelujem da vodimo brigu o našim starijim i nemoćnim u ovom vremenu koje je za njih posebno teško. Konačno, pozivam sve vjernike i vjernice da u ovim danima samoizolacije provedemo što više vremena u ibadetu, zikru, učenju Kur'ana, promišljanju o sebi i o svijetu oko sebe, postanimo svjesni koliko smo mali i nemoćni u usporedbi sa Gospodarom svjetova te ojačajmo nadu u Njega. Ne zaboravimo da se nalazimo u odabranom svetom mjesecu Redžebu, u kojem je ibadet još značajniji i jači.

Allah dž.š. u suri Junus, ajet 107 veli:

وَإِنْ يَمْسَسْكَ اللَّهُ بِضُرٍّ فَلَا كَاشِفَ لَهُ إِلَّا هُوَ وَإِنْ يُرِدْكَ بِخَيْرٍ فَلَا رَادَّ لِفَضْلِهِ يُصِيبُ بِهِ مَنْ يَشَاءُ مِنْ عِبَادِهِ وَهُوَ الْغَفُورُ الرَّحِيمُ

“Ako ti Allah dade kakvu nevolju, niko je osim Njega ne može otkloniti, a ako ti zaželi dobro - pa, niko ne može blagodat Njegovu spriječiti; On njome nagrađuje onoga koga hoće od robova svojih; On prašta i milostiv je.”

U vremenu kada su nam džamije zatvorene, učinimo sve naše kuće mesdžidima. Čuvajmo naše namaze i obavljajmo ih na vrijeme u našim kućama. Zamolimo Allaha dž.š. u našim dovama da nas sačuva od iskušenja koje ne možemo podnijeti, da nam podari zdravlje, nama i našim porodicama, da naše duše i naša srca očisti i prosvijetli nurom imana, da nas ojača kroz iskušenja koja nam šalje i ponajvažnije zamolimo Allaha dž.š. u našim dovama da nam oprost i grijehe koje smo počinili i da iz ovog iskušenja izađemo duhovno snažniji, od grijeha čisti i Stvoritelju svome bliži, Amin!

Sabahudin ef. Čeman

Muftija